

新刊權載之文集

權載之文集卷第四十三

唐權德輿字載之

表

趙相公謝賜金石瘞表

臣某言伏奉恩勅賜臣金石瘞并方及服法并金花銀
合一又賜臣蘇膏方及眼赤有瘡方其方皇太子書者
鴻私榮覲特發天心受恩拜賜慙怖交集臣聞台司之
任茂遂羣生而攝衛乖宜自貽病疾理身未暇賦政何
堪豈謂上簡宸衷俯矜賤質御方靈藥稠疊寵光劑和
至精減聖躬所服輸墨元妙降皇儲之書仰光輝而陋

目增明承渥澤而沉痼自愈致金石之固通性命之和
保持誨諭曲盡茲旨蠲其頑滯授以康寧省已何功害
盈知懼伏惟陛下宣布大化則時無疵癘懋建大中則
物以阜安生及昌期自登壽域况臣劣薄待罪樞衡感
平施而已深荷殊榮而難報雖陰陽不測犬馬之疾頓
瘳而日月無私瑩燭之光何補生成覆露皆稟眷慈竭
力致命豈申愚效無任感恩惶懼之至謹具表陳謝以
聞貞元九年六月日

盧相公謝中書侍郎表

臣某言伏奉今日恩命除臣中書侍郎同中書門下平

章事祇奉詔命循省妄庸感恩量力不知所措

中謝

臣

聞宰相者叙四時之化順萬物之宜用贊裁成使之茂
遂而中書密勿庶政本源以奉大猷是爲右弼臣實凡
輩本無他能家尚儒風獲承緒業因緣忝幸踐屢班榮
誠不自意忽焉過量台司待罪已涉三年妨賢旣久內
訟彌切蓋謹謹誠懼人之常分而訏謨教化宜擇全才
陛下在宥萬方躬勤百度豈廣賤黃再沐睿言特遷紫
微寶玷皇極臣面所陳讓推於至公天鑒未廻進退惶
灼且假人以器知臣者君猶奧鴻私俯察愚懇害盈之
禍敢愛微軀覆餗之憂難抑公議無任感恩怖懼之至

謹奉表陳謝以聞臣誠惶誠恐頓首頓首謹言貞元十
一年正月六日

賈相公陳乞表

臣某言臣以庸薄循省無堪遇蒙聖恩累忝非據自頃
歲任汾州刺史後三領節制一叨居守皆出於宸眷曾
不因人昨入覲闕庭特蒙叅列台鼎妨賢待罪荏苒四
年昧於攝生素又多病眼有翳膜之疾耳聞風雨之聲
自趙憬云亡盧邁染患忽忽驚悸舊疹頓加尸素之中
視聽不逮樞務至重萬方所瞻得人則理不可暫闕伏
望博選才彥上副憂勤雖竊位貪恩猶思自勉而省躬

量力誠所不任非求退讓之名寔爲官謗所迫伏希聖
鑒俯察懇誠無任惶懼迫切之至謹奉表陳請以聞貞
元十二年九月四日

盧相公謝賜方藥并陳乞表

臣某言臣自染偏風今已彌月將息未減渥澤轉深伏
蒙特令供奉僧智昌醫療并每日令中使存問及賜柳
湯煎驢頭方仍便令服餌者顧以庸賤昧於攝理久茲
竊位常懼害盈陰陽之和無補時化風毒生疾上煩聖
慈靈方御醫稠疊備至雖受恩服藥誠合漸瘳而福過
災生慮難自保况中貴將命寵臨私門犬馬之微日塵

薦續或有加減自合上聞非常之恩伏乞停罷且台司
要重庶政泉源以臣平居素積官謗今右邊手足動用
不隨自滯枕席已淹弦晦伏乞以時免職使得養疾家
居博求上才用塞人望則公朝無覆餗之責陋質荷生
成之仁今攝衣拜章力且未足口占代署貴達愚衷無
任感恩迫切之至謹奉表陳請以聞貞元十二年十月
一日

第二表

臣某言臣疾病所娶在假既久自審不逮遂有上陳詔
旨優答懇誠未允屏營慙懼不知所安臣聞爲官擇人

各司其局條責實效共致理平凡在庶寮猶不可曠况
宰臣之任鼎足承君調和陰陽左右教化能否之下利
害繫焉苟有所壅其傷必大以臣虛薄備位四年奉勵
精之勤但樂昌運當具瞻之地莫副羣心書曰百寮師
師百工惟時言得其人也語曰陳力就列不能者止言
審其分也况沉頓踰月冠帶未任風毒所侵難望速差
彼已之刺倍切於今以被病之微臣台司之厚祿自知
不可如公議何伏枕披誠再黷宸衷與迴天鑒俯遂愚
衷所謂曲成豈惟平施無任悃欵迫切之至謹奉表陳
請以聞貞元十二年十月八日

第三表

臣某言臣迫於疾療累有陳奏再奉詔旨私願未從感
恩則深量力難濟况偏風狀候與諸疾不同雖時似小
減終慮成沉痼中樞務重不可闕人自臣在假已四十
餘日曠廢甚兢惶益深一夫不獲一吏失職則繫聖
慮以之憂勞今臣手足未平心緒未復卧受豐祿胡顏
自安伏惟陛下順天理物躬勤庶政事無細大咸遂其
宜豈可獨私微臣久玷時化是以直疏誠懇不敢苟飾
煩詞冒穎宸嚴期於鑒照無任惶怖震越之至謹奉表
陳請以聞貞元十二年十月十六日

趙庶子相公謝平章事表

臣某言臣伏奉今日恩制除臣同中書門下平章事祇
荷成命捧讀詔書心魂震驚拜抃失次中謝臣聞熒贊

化源參和鼎實上合一德以平六符苟非其人所繫斯
重臣本虛薄素無器能徒以文藝獲承代業比肩多士
陳力清時累叨渥恩踐履官序頃歲奉職中禁草議南
宮遂忝左曹列於近侍顧常內訟已慮曠官豈謂宸眷
特加擢任非據伏自循省不知所安且臣去冬尚守郎
吏今纔一歲遂備台司自非今才難塞公議雖鞠躬匪
懈必盡事君之誠而宣化賦政恐累知臣之舉生成難

報覆錄是憂伏以面奉德音不敢更有陳讓拜章感涕
上荅何階無任荷戴惶懼之至謹奉表陳謝以聞貞元
十二年十月十七日

盧相公陳乞第五表

臣某言臣素以庸虛又嬰疾病半年在假未任出入四
表上陳備盡誠懇過蒙渥澤特賜優容聖慈則深私願
猶阻俯仰衽席兢惶靡寧臣本謂至春和得漸平復今
方藥遍用根本未除雖簪帶假人得以被體而趨步無
力難於拜恩輔臣之任百辟是仰遵守法度誠所宜先
豈有踰歲家居尚塵鼎餗况所受厚祿出於疲人竊位

公朝尚知不可沉痼私室何以自安易象害盈寔在今日伏惟陛下宏覆萬物曲成不遺凡在懷生各得其所以臣沉痼久曠官司前後陳聞披瀝肝膽期切之至謹奉表陳請以聞貞元十三年二月二十五日

第六表

臣某言臣待罪非據歲時已深寵秩逾涯灾患自至一從移病忽及周月五獻章表未遂血誠沉痼之身滯於牀枕職守之效絕於官曹虛費祿廩不安夙夜遂於去年五月二十五日進狀乞停俸錢自後不敢更有請受竊嘗素飧之責少息輿議丹懇之至上迴聖心邇來又

經九十餘日成命未下憂惶無措蓋聞祿以詔功又以
養賢以臣之愚無功久此尸曠俯仰內訟迫於公私臣
之情理實爲難處臣之言詞不能自達使得終獲退免
曲遂微誠亭育深恩寔在於此無任猥迫懇懃之至謹
奉表陳乞以聞貞元十三年九月五日

盧相公謝授賓客表

臣某言伏奉今日恩制除臣太子賓客眷慈曲被宏貸
特加捧承命書感抃交集中謝臣以庸劣累叨鴻私無
補廟謀徒速官謗妨賢歲久嬰疾日深累陳愚衷上牘
宸鑒敢言知止誠以乞身陛下亭毒之恩不遺微細載

紓詔旨尚列師賓全度終始於臣爲厚跼天蹐地空荷
生成無任感戴欣懼之至謹奉表陳謝以聞貞元十年
九月七日

賈相公陳乞表

臣某言臣以庸愚謬尸寵祿位居師長職重台司徒叨
渥恩無補時化踴躍荏苒六年於茲去秋已來多病相
繼每自策勉以奉休明而筋骸內衰官誘外積近染痢
疾綿歷旬時進退之狀不恒寢食之理皆耗伏枕循省
無所克堪凡在常情皆願貴仕况臣累蒙任使實越等
夷從容朝堂沐浴天澤恩私歲久誠每切於匪躬疲朶

日侵事有迫於量力伏惟陛下覆育臨照曲成不遺俯
矜愚衷移授故秩則樞軸不曠輪轅適宜拳拳之誠所
望斯足無任懇歎惶懼之至謹奉表陳請以聞貞元十
四年七月二十二日

鄭相公讓中書侍郎平章事表

臣某言伏奉今日恩制授臣中書侍郎同中書門下平
章事詔書自天受命惶惶俯伏猶省不知所容申謝臣
聞宰理中樞從古所重貞教化之本導陰陽之和外撫
四夷內循百職或乖於是則謂曠官臣志在服儒才非
經遠爰自筮仕期於代畔而遭時踰量踐歷朝序自奉

禁中之職累叨望外之恩超貳冬官兼司選部流品未
序銓綜乖方以榮爲憂伏待譴責豈謂特延眷渥參列
廟謀以瓶筭之資當柱石之重况臣自去夏尙守臺郎
周月之間遂懸相印承陛下勵精之理副陛下則哲之
明量力省躬必知不可伏乞俯廻詔命別選公才敢憑
血誠上顙天鑒無任惶懼懇迫之至謹奉表陳讓以聞
貞元十四年七月二十五日

崔相公謝門下侍郎表

臣某言審已無庸謬膺寵授昨所陳讓迫於懇誠冀全
至公豈敢外飾黃閣務重非才實難墨詔復臨捧讀增

懼臣聞惟君知臣任之以器惟臣事君量而後人生逢
昌運自比可封之人職在台司難逃竊位之責三年待
罪無補盛明再命逾涯轉速官謗天威咫尺愚慮屏營
伏以令斷表章不敢累贅宸辰雖誓心畢命以竭微衷
折足濡翼其如公議無任感恩惶懼之至謹奉表陳謝
以聞貞元十四年七月二十七日

賈相公謝賜馬及銀器錦綵等表

臣某言今日中使某乙奉宣進止以臣所進關內隴右
圖并錄十卷特賜馬一匹并銀瓶盤等若干事錦綵若
干疋者承命忭舞震驚失圖伏以聖朝覆燾無私聲教

遠被雖夏書禹貢周制職方重譯所通未若今日臣以
末學獲奉昌期嘗好地理之書頗知河湟之事明徵史
事博考前聞夙夜以思歲時遂久紀諸文字續以丹青
上塵聖聰庶備方志豈謂眷慈宏獎寵賚特深出珍華
於內府下駟駿於天廡恩榮所及煥麗相輝循顧庸虛
曲承蕃錫負乘匪服併切於今無任感恩荷戴之至謹
奉表陳謝以聞貞元十四年九月五日

齊相公讓修國史表

臣某言臣去九日於延英對陛下勤求理本語及史官
遂命崔損承旨令臣兼修國史臣省已無取受恩殊常

倉惶震驚未及陳露今日中使某乙奉宣進止授臣此職竊自思忖非所克堪誠戴屏營不知所據伏以褒貶善否裁成義類直詞是繫往哲攸難臣謬踐台司無補皇化每憂覆敗上負聰明豈足以再紓宸慈累添榮渥稽前古之翼訓明聖朝之法誠立言載筆豈易其人力量循涯自知不可又自貞元四年李泌後宰臣遂不兼此職蓋以論著慎重留於聖心自非時謂全才何以遠循故事用此內省以榮爲憂況君舉必書時同堯舜之理任人以器顧無遷固之能所願殊私特寢成命無任感恩惶懼之至云云貞元十八年五月十八日

齊賓客相公進所賜馬表

臣某言臣頃待罪中樞特蒙眷渥旣切維鵠之刺又叨
錫馬之榮憂在忝曠積成疾瘵聖慈全貸尚列師賓見
驚福過之灾猶積喜中之懼况茲天驥輒自御閑寢有
代勞之功且期致遠之用特優賜與以寵宰司臣自改
官卽合進納而心力衰耗晦明纏綿筋骸自便惟在牀
衽視聽所知不過湯藥沉疴餘息有異常人平居故事
皆所廢忘頃年愧懼已切於負乘今日稽留自疑於尊
魄因緣尸素積累罪辜踈愚昧督隕越無地謹隨表奉
進無任惶恐震懼之至臣某頓首謹言貞元十九年閏

二月二十三日

賈柏公陳乞表

臣欽言伏奉今日制條除臣檢校司空兼左僕射依前同中書門下平章事祗荷成命奉戴恩私心魂震驚慙怖失次臣以庸薄無他才能先朝過聽謬賜駝策叨居鼎餚十有三年猥承雨露之恩終闕涓埃之效累經陳乞未允懇誠復以餘年再承休命自陛下纂膺寶祚澤被羣生亭育所加飛沈遂性而臣齒髮頽暮沃恙嬰侵筋骸日衰心力皆耗况宰相之職用調陰陽司空之官實平水土從古授受重難其人以臣平居知猶不可今

中卽眩暉外亦支離寢興不安言語失次豈可苟貪貴仕
上玷清時省躬則然况在公議古者君有致政之惠臣
感得謝之恩鐘鳴漏盡前哲所誠年衰疾劇在臣爲甚
迫於情理敢顙天威懼懼血誠期在鑒聽無任懇欵恐
懼之至謹奉表陳讓以聞臣耽誠惶誠恐頓首頓首謹言
貞元二十一年三月二十一日

第二表

臣耽言臣以疾病所迫氣力不任輒露總誠上祈退免
聖慈備至私願未從詔旨便蕃慰勉纖悉自宜策勵以
奉休明謗讟之誠敢忘夙夜犬馬之疾日益纏綿視聽

昏煩舉措乖誤心不記事口不逮心神理害盈正謂今日昔韋賢致仕著在漢庭韓厥請老書於魯史豈可以茲沉廢苟汚班榮迫於公私非敢攜挹自聖明馭宇動植覃恩豈於庸愚獨阻誠志乞迴天鑒俯遂殘生伏紙上陳感涕嗚咽無任惶懼懇切之至謹再奉表陳乞以聞臣耽誠惶誠恐頓首頓首謹言貞元二十一年三月二十七日

第三表

臣耽言臣殘年沉瘵漸不支持再表上陳未蒙允許顧茲朽質徒感鴻私而枕席纏綿形神消耗上台之任歲

月積深大病之期晦明難保自叨升論道扶疾拜恩兩
來狀候日以羸頓災因福過足驗於今伏乞賜臣骸骨
收臣印綬期於必遂不敢煩詞無任量力懇迫之至謹
奉表陳乞以聞貞元二十一年五月二十日

第四表

臣耽言臣聞生人所欲豈過富貴仕進之榮無踰公相
臣受祿過厚叨恩過深疾瘵所侵日日以甚表章三上
宸眷未迴荼然私室溘盡是慮臣頃歲齒及懸車疾經
百日輒授禮令乞遂休闋先聖優容未遂矜允今則桑
榆轉迫沉頓寢深比於往年遠不及前後陳請備竭

肺肝特希望慈俯鑒愚懇羸憊假息所望退身瀝血披誠伏待明命無任屏營懇迫之至謹奉表陳乞以聞貞元二十一年七月二十日

第五表

臣某言臣以庸愚累叨爵命大行皇帝拔擢非次列於宰司歲時寢深塵露無補太上皇踐祚聽政寵登三公而臣寢疾所嬰已在牀枕沉痼日劇氣力漸微自春涉秋四表陳乞伏遇陛下繼明纂統臨照萬方澄清化源朝野相慶但臣百疾所湊四支不任豈使將盡之人猶處具瞻之地私誠所迫上躡宸嚴旣非飾讓期在聽納

無任懇惄迫切之至謹奉表陳乞以聞永貞元年八月
八日

第六表

臣某臣言犬馬之疾福過灾生前日已來轉就危困自
量氣力的不支持自陛下嗣纂睿圖臣已寢療綿亟竟
不得一趨雲陛上謁龍顏幽壤之中以此爲恨臣備位
宰相歲時最深永歸泉下無補明代伏惟陛下爲萬姓
自愛則幽明蒙福無任感恩哀戀之至謹奉遺表以聞
永貞元年十月一日

權載之文集卷第四十三

權載之文集卷第四十四

唐權德輿字載之

表

中書門下賀雲南軍破吐蕃劍山保定城表

臣某等言伏見劍南西川節度使某官某所奏兵馬使
宋晁前月十八日與雲南軍合勢攻破吐蕃劍山保定
城當日斬城使者伏以聲教所被遐邇大同蠢茲西戎
尚有遺類或犯亭鄣且稽愆誅陛下眷算無窮天威遠
震以夷裔感恩之衆佐藩隅制勝之臣取以多方累獻
戎捷事皆前定必稟聖謨斬將搴旗出於料外堅城便

地盡落發中通荒服會朝之途絕餘孽窺覦之隙奉威懷之命以律而臧兼夷夏之師在和而克此皆陛下神武潛運妖氛永清由是成擒自當盡敵臣等謬當樞近媿乏廟謀幸覩成功不勝大慶無任欣抃之至謹奉表陳賀以聞貞元十年十二月三日

中書門下賀元誼李文通出洛州城表

臣某等言臣等今日面奉進止元誼李文通等蒙恩宥過以今月七日將領將士出洛州城者伏惟皇帝陛下聖神之化懷保元元仁洽好生感深格物誼等列於守將本以忠勞師旅之間失於慮始蒼黃之際自謂匪人

士吏危疑謀猷回遙陛下以震耀所及殺傷則多曲成
以誘其衷持久以通其變愀然轉念不忍致誅待以初
心許之遷善指期開壁率衆來朝實賴亭毒之恩再全
臣子之節宥茲一眚昭示萬方睿慈所宏動植知幸臣
等虛薄備位臺司愧無調鼎之能獲覩止戈之慶無任
欣抃踴躍之至謹奉表陳賀以聞貞元十二年正月十
三日

中書門下賀汴州擒送李迺表

臣某等言中使某乙奉宣進止汴州以今月三日擒送
李迺軍州並已寧帖者伏以聖德含宏在宥天下而匪

人醜類自抵刑章李迺本以庸微謬從軍校潛懷狂戾
輒擾師徒乘其疾病坐邀職秩恬亂以逞志專戮以作
威人思納忠義不同惡俄就械繫一方晏然雖鳬獍之
心暫求假息而鷙鷃之逐曾不崇朝衆情交欣以待朝
旨一昨陛下命將相之衆撫綏是邦明書罪人且示輕
典成命方下浚郊以清聖謨炳然若合符契足使義士
勵節貪夫革心稟化畏威無有違迺臣等謬居臺鉉每
奉德音媿乏嘉猷以承督略無任歡抒慶幸之至謹奉
表陳賀以聞貞元十二年七月九日

中書門下賀靈武大破吐蕃表

臣某等言臣等今日固奉德音靈武大破吐蕃擒生斬將者伏以尋謀武經陰陽上略兵符所授公戰多方盡茲犬羊尚勞爛燐羣師稟命中權戒嚴掎角桓因初設險於三覆奇正合發俄獻功於九擒數酋渠之首級積戎械於亭候勝氣餘勇敢行無前卽叙可期有征斯在臣等謬居樞掖莫効涓埃每承以律之貞空荷止戈之運無任慶快踴躍之至謹奉表申賀以聞貞元十四年十一月二十九日

中書門下賀蔡州營招討使破賊表

臣某等言伏奉宣示蔡州行營招討使韓全義所奏去

四月二十七日於逆賊吳少誠界破賊驃子及馬步軍三千餘人賊弟吳少陽棄眾奔遁者伏惟陛下聖神廣運丕冒萬方而顛越匪彝自蹈鋒刃德音累降晚告不悛禁暴安人酌於軍志命師授律發於宸心整旅有嚴拊循決勝據便地以三覆分銳師而九攻材官突騎奮勵精勇敢行所及莫敢枝梧奔北之徒自相蹈藉威謀克壯殺戮斯多更候便宜續圖攻取蒙輪超乘靡不賈餘長轂鈞援期於盡殪此皆眷慕前定純臣協心併清淮濱以慶天下臣等謬居樞近喜萬恒情無任忻抃踴躍之至謹奉表陳賀以聞貞元十六年五月四日

中書門下賀雪表

臣某等言臣聞王者法天布令有以感通則元氣調和
庶徵時若按汜勝之書云雪者五穀之精伏惟皇帝陛下
以人爲心以歲爲瑞故月當大呂節近嘉平信宿之間
盈尺可驗光連萬頃已奪皓鶴之鮮慶在于箱更徵
田畯之喜臣等謬居樞近獲覩休祥無任喜抃躍躍之
至謹奉表陳賀以聞貞元十二年十二月九日

中書門下賀雨表

臣某等言臣聞王者以誠愛人以德動天則交感不違
庶徵時序頃自春澤愆候上軫皇情協用五紀憂勤六

事暨純陽之節雩禱是脩齋心勞慮恤隱有過雲觸石而興潤月離畢以呈祥南轍就功西成可望含餌鼓腹幼艾相歡見聖人之化育符上帝之陰陽臣等忝列官司喜萬常品無任慶抃躍躍之至謹奉表陳賀以聞貞元十三年四月十一日

中書門下賀雨表

臣某等言百穀所仰甘雨是資三務成功望歲斯切雖閏候頗晚農畔未遲而時澤小愆皇情所軫齋禱上感陰陽以和逮興有渰之淥方茂如茨之稼况霖霖未已凡私必均叶聖造之休徵副元功之育物臣等謬居樞

近喜萬常情無任欣賀抃躍之至謹奉表陳賀以聞臣某等誠惶誠恐頓首頓首謹言貞元十四年四月十七日

中書門下謝雨雪量放朝參表

臣某等言伏奏今日進止卿等朝列是常或陰雨不聞鼓聲則不免犇波走馬忽有墜損深軫朕懷自今已後縱鼓聲差池亦不得走馬并時暑稍甚及雨雪泥潦亦量放朝參者伏以夙興趨朝辨色就列臣下之制則惟其常陛下特降殊私上煩深慮當宵衣之際念陳力之臣或恐聲鼓差池登車犇迫且憂暑雨遂及祁寒篠或

驅時寬朝請曲成周於萬物厚澤浹於四時恩出非
常事超前載臣等謬居樞近首奉德音無任忻忭感載
之至謹奉表陳謝以聞貞元十三年六月十二日

中書門下賀聖躬減膳降雨表

臣某等言臣聞王者祇若天心勤恤人隱必有交感之
速以叶順成之祥頃自春及夏時雨尚少稼事所切皇
情載勤分命官師虔修祠禱而又齋誠減膳感達上元
以蒸人望歲之心爲陛下納隍之慮兼軫幽繫議寬猶
罕意纔發於穆清月已離於星畢需然周洽會不崇朝
靡失長嬴之期方興多稼之咏茂遂生植統和陰陽敬

康之誠音疾遐邇臣等參居近列獲奉冒時無任欣抃
踴躍之至謹奉表陳賀以聞臣某等誠惶誠恐頓首頓
首謹言貞元十五年五月十九日

中書門下賀德音減放夏麥并賑給表

臣某等言伏奉今日制奉先等五縣夏麥除得水利外
損者並放長安等一十八縣更審巡覆聞奏卽有進止
仍委有司計會賑給者伏惟陛下愛人之心與天合德
憂勤亭育務盡其宜頃者春澤愆期夏麥非稔若保赤
子軫於皇情降損寢食虔恭齋禱一時不雨已深求瘼
之恩一穀未登則下責躬之詔蠲其南畝之稅賑以太

倉之儲德音霈然動植相賀燦怛之愛纖悉無遺申戒
官司宣明聖澤歡聲發於轂下嘉氣周於域中凡在生
靈孰不鼓舞臣等謬居近列首奉鴻私旣乖燮理之能
倍切負乘之懇無任捧戴慶抃之至謹奉表陳賀以聞
貞元十四年六月二十七日

中書門下賀八陵修復畢表

臣某等言臣聞宗廟之享以致吉蠲山園之制以極嚴
敬國朝祀典參用漢法寢宮便殿虔奉衣冠日往月來
久未修復伏惟皇帝陛下繼明恭已大孝因心不承祖
宗對越天地薦馨香於九廟崇經構於八陵庶工子來

百堵皆作人神協吉龜筮告猶用成奕奕之新實自烝
烝之孝行官盡復神御以安掌禮之官虔於受命奉陵
之縣但覩成功慮財用而不賦於人量事期而不愆於
素罔極之感交於神明奚斯闕宮徒頌諸侯之事叔孫
原廟蓋匪先王之法孝彰禮備壹比於今列聖在天萬
方受祉春秋匪懈超冠百王臣等謬忝台司獲承詔旨
無任誠賀之至貞元十四年八月十七日

中書門下賀雪表

二首

臣某等言臣聞王者布令以時應天以實惟茲瑞雪用
兆豐年伏惟陛下齊誠念人振廩恤隱同雲斯應宿麥

可期以五穀播植之精驗於農志當一陽發生之候助此休徵迺感不違朝野相賀臣等謬居近侍獲奉昌期無任欣抃踴躍之至謹奉狀凜質以聞臣某等誠歡誠喜頓首頓首謹言貞元十四年十一月十日

中書門下賀雪表

臣某等言臣屬天道下濟聖心上感以是訢合發爲休徵惟茲雨雪之祥必稽時令之順伏惟皇帝陛下憂勞庶政勤憫蒸人鑒寐之間不忘於念慮賑恤之使相繼於道迄膺寸祉雲盈尺呈瑞以來麰之積潤爲嗣歲之頤成如京如坻百嘉可望旣需旣足率土同歡臣等忝

列侍臣倍恒忻賀無任慶抃踴躍之至謹奉表陳賀以聞臣某等誠歡誠喜頓首頓首謹言貞元十四年十一月二十二日

中書門下賀雨表

臣某等言臣聞聖人之德與天地合則庶徵時若生類昭蘇伏惟陛下慈愛元元統燭一作御萬物憂在稼穡切於登成慮甘澤之愆期憫蒸人之望歲誠之所感天且不違有渰而興晦一夕之霑洽大田相慶知百穀之阜蕃農夫克敏秀者皆寔簞笠就緒倉箱可期遠邇幼艾忻歡鼓舞臣等謬當近侍喜萬常情無任喜抃踴躍之

至謹奉表陳賀以聞臣某等誠惶誠恐頓首頓首謹言
貞元十四年十一月十日

中書門下賀興慶池白鷺鷺表

臣某等言伏承陛下以去九日幸興慶池龍堂爲人祈
雨忽有一白鷺鷺見於池上衆鷺鷺羅列前後如引御
舟明日之夕澍雨遂降者伏惟陛下子惠元元躬勤庶
政念切時澤虔於禱祈以陛下如傷之誠上感元貺在
列祖發祥之地下降靈禽潔白異姿翩飛成列若導天
意以承宸衷簇疾一作英陰雲於一夕洒霑澤於千里疾均
影響慶深公私昔周致白翟徒稱遐遠漢歌赤鴈亦薦

郊廟豈比今日感於至誠瑞牒所無蒸人何幸伏惟宣付史冊昭示將來臣等備位鼎司倍百歡賀無任欣慶
抃躍之至謹奉表陳賀以聞貞元十三年四月十二日

中書門下賀滑州黃河清表

臣某等言今日內侍朱希顏奉宣進止示臣鄭滑觀察使姚南仲所奏今月一日至六日白馬縣界三十里黃河清者伏以導自積石出於崑崙乃建靈源之封特視上公之禮克符昌運必降殊祥伏惟陛下聖澤感通休禱一作徵一體惟此濁質化爲清瀾國典所書是稱大瑞詩曰俟河之清人壽幾何歎其不可得而見也今則自

馬之津三十里所澄澈如練渝漪成文一邦幼艾共觀
嘉應萬寓經界式彰永寧昔秦號水德徒推厭勝漢紀
河平苟安決溢神功幽贊獨表清時足以薦諸宗廟書
之史策臣等謬登樞近獲奉休明無任欣抃踴躍之至
謹奉表陳賀以聞臣某等誠歡誠喜頓首頓首謹言貞
元十四年閏五月十五日

中書門下賀河陽獲白兔表

臣某等言今日中使楊明義奉宣進止示臣河陽三城
節度使李元淳所奏今月六日於河陽縣城南社壇獲
白兎者謹案孫氏瑞應圖曰王者加思耆老則白兔見

又前史所稱多自純孝所感伏惟皇帝陛下誠合天地
孝邇神明元符嘉祉遠近相屬惟此瑞獸是稱月精來
應昌期皓然雪彩當盈津之壘俯勾龍之壇郊畿士吏
駭視歡賀且自前歲已來中外所列凡在羽毛之族多
呈皎潔之祥今八陵圓寢脩復斯畢萬國臣寮手足相
慶盛儀旣展靈貺斯臻幽贊素姿若合符契臣等謬居
台鼎倍萬常情無任慶抃之至伏請宣付史館謹奉表
陳賀以聞貞元十四年八月二十二日

中書門下賀醴泉獲白鹿表

臣某等言今日中使某乙至奉宣進止示臣等醴泉縣

鎮遏使康志寧於建陵柏城外得一白鹿者謹按孝經援神契曰王者德至禽獸則白鹿見又孫氏瑞應圖曰王者惠及下民則至伏惟皇帝陛下聖德廣運與天合符尊祖敬宗愛人育物含靈効祉叶贊休明惟此仁獸式彰孝理皎然玉質俯近軒臺獨羨羨以不羣亦呦呦而遂性漢得之於槐里齊獲之於敏丘呈祥瑞聖豈比今日臣等謬列台司無補時化每承靈貺徒竭歡心無任慶抃躍躍之至伏請宣付史館謹奉表陳賀以聞貢元十四年九月十九日

中書門下賀邢州獲白雀白山鵲等表

臣某等言今日伏奉宣示昭義軍節度使李元淳所進
於邢州獲白雀白山鵠各一者謹按孫氏瑞應圖曰王
者奉己儉約尊事耆老則白雀見又晉中興書曰天下
安寧則見伏惟陛下純儉成化乾坤合符敬彼黃髮感
茲霜毳俗旣登於壽域事多驗於祥經用應昌期固無
虛月昔神雀効祉乾鵠知來或用以紀年或聞諸往載
豈此山禽叶質靈貺特殊皎潔異姿追飛交映休嘉所
策遐邇同歡臣等忝列台司倍百忻賀無任喜慶踴躍
之至謹奉表陳賀以聞

中書門下賀恒州華州嘉禾合穗表

臣某等言伏見武俊所奏恒州鼓城縣生嘉禾一本合
穗又盧徵奏華州鄭縣太平鄉三交里獲嘉禾一穗者
謹按孫氏瑞應圖曰嘉禾者五穀之長王者德茂則生
伏惟陛下德叶元功仁育生類同穎擢秀殊祥並時昔
周道旣昌唐叔以獻表天下和平之兆爲陰陽訛合之
符今五穀登成百嘉儲祉發於厚載集是休徵况嶽鎮
之方表章繼至感通昭晰莫甚於斯臣等忝列台司喜
倍常品無任欣抃踴躍之至謹奉表陳賀以聞臣某等
誠歡誠喜頓首頓首謹言貞元十五年九月七日

中書門下賀許州迪理棠樹表

臣某等言今日中使某乙奉宣進止示臣等陳許州觀察使上官況所奏許州長社縣嘉禾鄉合穗村連理棠樹一株者謹按孝經援神契曰王者德及草木則木連理伏惟陛下聖澤元功浹洽生類故天休滋至地產交感亭育變化發於百祥珍木敷榮異根合幹表慈植物以瑞康時况嘉禾各地已同唐叔之獻甘棠挺秀寧比名南之什芬芳連理遐邇叶心藂滋慶祉昭煥圖籍臣等謬忝鼎餗喜萬常情無任欣抃踴躍之至謹奉表陳賀以聞貞元十八年四月一日

中書門下賀元和殿甘露降表

臣某等言今日中使某乙奉宣連止示臣等元和殿甘
露降於桐樹丁香樹者謹按孝經援神契曰王者德至
天則甘露降孫氏瑞應圖曰王者和氣茂則降於草木
伏惟陛下聖德感通殊祥允集當長嬴之月下順人心
降穆清之中上昭天意太和陰陽雲液潛滋屑玉綴珠
團枝泣葉質同雪白味若飴甘瀘珍木以相鮮激繁香
而合發雖軒工頌瑞漢史紀年徒習前聞豈如目覩此
皆協氣旁達一作至天休合符凡在寰生不勝大慶等謬
居樞近倍萬歡誠無任欣抃躍之至謹奉表陳賀以
聞貞元十八年五月十八日

中書門下賀神龍寺渠中瑞蓮花表

臣某等言今日中使某乙奉宣進止示臣等神龍寺殿前渠中瑞蓮花圖其花一莖兩房者伏惟陛下仁聖咸通宏被生植宥萬方之暇必順天心於九重之中別開佛刹綱緼降祉齒苔敷榮瑞茲灼灼之花迫出田田之葉吉祥殿外芬馥殊常功德池中光華交映扶疎發越並秀相鮮元功嘉應超貫圖謀彼芝稱三秀麥有兩歧雖驗休祥豈階妙法覩雙房之挺茂荷一雨之均霑陰陽生成發揮嚴淨臣等忝居樞近倍萬歡心無任欣抃悅懌之至謹奉表陳賀以聞貞元十八年六月八日

權載之文集卷第四十四

權載之文集卷第四十五

唐權德輿字載之

表狀

中書門下謝御製九月十八日賜百官追賞因示所懷詩狀

右中使楊光瑤至奉宣恩旨賜臣等前件詩者睿詞炳煥降自九霄天澤昭臨榮加百辟旣聯湛露又沐卿雲感今日之和聲助林塘之霽色况錫宴之際極其寵光求理之深播其雅頌樂以發德文以化成由其歡心盡躋壽域跪捧三復備見皇慈臣忝跡樞密親承聖渥無

任感恩抃躍之至謹奉狀以聞貞元十年九月十八日

中書門下進奉和御製九月十八日賜百官賞

因示所懷詩狀

右比年以三令節賜百僚宴賞昨者時及重九陰雲未
收特延聖慈又改良日中宴之際俯降睿詞猶元氣之
涵煦比慶霄之紛郁裁有六義昭示萬方湛恩自天具
物知感况陛下以誠信施教以慈愛緣情形於詠歌繫
在風化伏以唱和之重合綴庸音而動植之微何酬元
造臣等忝居樞近首沐鴻私竊抃率舞不能自抑謹獻
奉和聖製詩一首詞理鄙淺輕冒宸嚴無任感恩喜躍

之至謹詣延英門隨狀封進以聞貞元十年九月二十四日

中書門下謝御製九日言懷賜中書門下及百寮詩狀

右中使王敬親至奉宣恩旨賜臣等前件詩者伏以聖人之言律度天下特降睿藻發於深誠極三代之質文致萬方於仁壽時當令節慶屬豐年同在鑄之和樂異橫汾之靡曼臣等謬居樞近每沐鴻私空瞻日月之光難酬雨露之施無任感恩抃躍之至謹奉狀陳謝以聞貞元十一年九月九日

中書門下奉和聖製九日言懷詩賜中書門下及百官詩進狀

右今月九日中使王敬親至奉宣恩旨賜臣等前件詩者日月麗天萬物皆覩韶咸度曲八音克諧伏惟陛下有堯之文思舜之恭已每睿詞下降皆以人爲心故宴樂以示慈惠詠歌以昭教化歡令節慶有年順時賦政之祥也敦九族安萬邦自中發外之澤也然後以太平之化躬行於今知之非難是謂至德豈比夫漢武魏文屬詞類事而已臣等叨居近侍首沐湛恩空仰昭回難酬覆露謹各獻奉和聖製詩一首輒以蕪鄙上願宸聽

庶達封人之心敢比賡歌之義無任感恩戰懼之至謹
詣廷英門隨狀封進以聞貞元十一年九月十五日

中書門下謝御製重陽日中外同歡以詩言懷
因示羣官一首

右中使劉希昂至奉宣進止賜臣等上忤詩者伏以陛下順用二儀曲成萬物王道正直天文昭回因令節以宴樂發睿慈於歌詠煥然麗藻不變時風慶屬有秋化覃無外凡百臣庶一其歡心臣等忝居台司首承渥澤無任感戴欣躍之至謹奉狀陳謝以聞貞元十三年九月九日

中書門下進奉和聖製重陽日中外同歡以詩言志因示羣官狀

右今月九日中使劉希昂至奉宣進止賜臣等前件詩者臣聞惟天聰明惟聖時憲故三辰爲章六義成文伏惟陛下端拱穆清慮必周於皇極錫宴重九恩每覃於百寮煥發睿詞化成天下書於右史實邁前王臣等才異賡歌職叨近侍在宥之化皆獲可封聞韶之時忽焉竊抃謹各獻奉和聖製詩一首輒以荒鄙輕穎天威無任感恩戰慄之至謹詣延英門隨狀封進以聞貞元十三年九月十六日

中書門下賀新製中和樂狀

右中書門下奏今月七日伏蒙聖恩賜臣麟德殿宴會觀上件新樂臣聞先王作樂必本人情所以崇德所以辨政伏惟陛下以大中設教以大和育物肇創嘉節於今十年年皆順成俗以仁壽今則睿謀廣運度曲惟新三位序邁韶咸之美八卦成象見天地之心制氏未覩其鏗鏘伶官甫披其行綴聲歌所感遐邇同歡臣等職忝台司時逢交泰昨已面有奏陳請付有司頒示四方永光樂府仍請編入史冊伏望天恩允臣所奏貢元十四年二月十二日

中書門下進奉和聖製中春麟德殿會百寮觀
新樂詩狀

右今月七日伏奉聖恩賜百寮麟德殿宴會羣臣觀新
樂并賜臣等聖製詩序者伏惟陛下法天授人順時布
政中和制樂以叶六律之音元首作歌以廣百工之業
感於順氣諧此正聲春臺煦然生物資始洽慈惠於臣
庶播易良於國風照燭乾坤輝動金石臣等獲叨近侍
曲被湛恩旣在藻以遂性亦聞韶而忘味敢附典謨之
末顧慙廢載之詞謹各獻奉和聖製詩一首謹詣延英
門隨狀封進以聞貞元十四年二月十三日

勅批

朕思以中和被於風俗旣傳令節載序樂章因會羣寮用申歡宴斐然成韻有媿非工卿等各抒清詞咸推藻麗再三省覽良用嘉焉所獻知

中書門下謝御製中和節賜百官宴集因示所懷詩狀

右今日中使薛盈珍至奉宣進止賜臣等前件詩者臣聞天以雲漢爲章昭回於上人以文義爲紀化成以下伏惟陛下勤慮理本合於中和月當中春日乃初吉特降藻思助其發生虫勾萌以至於暢茂推誠信以均其

化育捧戴殊觀如登春臺慶霄天籟耳目清越凡在百
辟一其歡心臣等謬列台司首承慈渥無任慶抃躍躍
之至謹附狀陳賀以聞謹狀貞元十七年二月一日

中書門下進奉和聖製中和節賜百官宴集因
示所懷詩狀

右今月一日中使薛盈珍至曲江會所奉宣恩旨賜臣
等前件詩者上齊二曜旁合八音闡文教於休明叶昌
期於亭育况茲令節克順人心延仲月以違晦撰良辰
而得一亦旣逾紀必聞有年生植阜蕃休嘉文感而又
言志以藻口作樂以同和示湛恩於宏覆俾庶類於咸

若臣等職叨近侍仰戴元功華封祝堯徒有其志虞臣
歌舜豈易其才謹各獻奉和聖製詩一首輒奏膚音上
塵聰聽無任感恩喜懇之至謹奉狀陳奏以聞貞元十
七年二月九日

中書門下謝聖製重陽日卽事六韻詩狀

右中使劉希昂至奉宣進止賜臣等重陽日詩并賜茶
酒音樂令臣等樂飲者伏惟陛下以睿聖之姿廣文明
之運每因嘉節必布鴻私錫宴同和凝旒振藻八音合
發六義相宣降於雲霄粲若神象然後宴樂慈惠霈然
寵光衢酒蘋絃承九天之慶賜秋光霽景見百穀之順

成合德不違憲若符節小大臣庶鼓舞相歡臣等忝列
台司倍萬欣賀無任喜抃躍躍之至謹奉狀陳謝以聞
貞元十七年九月九日

中書門下進奉和聖製重陽日卽事六韻詩狀
右今月九日高品劉希昂至曲江宴會所奉宣進止賜
臣等前件詩者伏惟陛下覆露亭毒以人爲心文明法
象與天地準緣聖情以稽四焰酌時令以休百工法言
麗藻盈耳溢目臣聞日之出也照先及於扶桑雲之興
也潤亦應於柱礎臣等旣叨近侍首沐鴻私輒罄庸音
以申攀和蹄涔越海誠亦無因塲轂向陽猶思自効謹

各獻奉和一首輕贊宸嚴心神戰越無任惶怖悚慄之至謹奉狀陳奏以聞貞元十七年九月十九日

中書門下賀建康郡王雙誕皇曾孫狀

右今日伏見中使朱希顏云建康郡王雙誕皇曾孫者伏以聖慈馭物有亭育之仁故上天陰隲降蕃衍之祉協本支百世之義見曾孫雙誕之祥克禋克祀每勞於前古無灾無害方盛於今日熊羆並夢棠棣連芳遠同華封之祝更鄙商瞿之歎斯實莫大之慶用表無疆之休所以永固皇家增耀磐石臣等忝居近列倍萬歡心無任抃躍之至謹奉狀陳賀以聞貞元十年十二月十

五日

中書門下賀南詔異牟尋授冊禮畢表

右今日中使某乙奉宣進止得劍南西川節度使某乙
奏得冊南詔副使寵頎狀云異牟尋以十月二十七日
受冊禮畢迎候祇應皆竭深誠又冊命之時天宇清朗
者伏以聖澤所覃殊方卽叙奉使臣之禮遠稟綏懷當
錫命之時盡其誠敬變西南陰晦之候感天地休嘉之
祥此皆虧渥遐宣上元降祉永寧萬寓守在四夷臣等
忝備台司不勝大慶謹奉狀陳賀以聞貞元十年十二

月二十一日

中書門下賀幽州盧龍軍節度使檢校尚書右
僕射劉濟去四月十七日於室韋川等三處大
破奚虜六萬餘衆狀

右今日中使某乙至奉宣恩命示臣等前件破賊露布
者伏以王澤所覃裔夷率化蠢茲小醜敢負深恩時懷
向背之心或作方隅之梗守臣宣力師律戒嚴隨其嘯
聚必就擒剪阨害之地分設三軍首級之數動逾萬計
此皆睿謀陰隲武旅成功臣等忝備台司累覩戎捷無
任慶幸之至謹奉狀陳賀以聞貞元十一年五月七日

中書門下賀降誕日麟德殿三教論議狀

右三教源流久無錯綜或使後學泥於通途陛下遂萬物之宜御六氣之辨徵緇黃之侶振元古之風精義入神微言盡性然後稽合同異討論指歸以元元之慈儉宏於在宥以釋氏之定惠納諸誠明用濟斯人共陶鴻化足以光策壽於東觀資聖壽於南山臣等備位台庭仰承至論無任慶抃欣躍之至謹奉狀陳賀以聞貞元十三年四月二十一日

中書門下奉韋臯奏南詔奉聖樂章狀

右中書門下奏中使楊明義奉宣韋臯所奏南詔奉聖樂章嘉其遠誠昨已閱試卿宜知悉者伏聞樂以導志

感而成聲故有翕純皦繹之音韻任禁昧之奏以節百事以平八風伏惟陛下覆露法天和澤柔遠順氣旁達殊方洽歡願爲保障以稟聲朔納邸獻樂贊揚時休制氏新其曲度舌人協其辭禮雖渝舞可翫夷歌成章兩漢所書未若今日伏望宣付有司編諸史冊貞元十六年正月二十八日奉勅宜付所司

中書門下賀劍南西川節度使去八月十八日於雍州靈關路大破蕃寇拔木破城并破通鶴軍天寶城應擒生斬級焚燒倉庫樓閣收獲羊馬器械等狀

右今日中使某乙奉宣恩旨示臣等韋某奏表大破吐
蕃擒生斬級者戎醜負恩乘秋竊發敢擾邊鄙自干誅
夷伏以睿略無方守臣授律龔行決勝之策分遣賈勇
之神面縛首級風驅電掃屠堡柵而平其險阨焚倉廩
而盡其糗糧南路靈關旣無遺類西郊朔塞可以成擒
神武指蹤四方宣力奇功吉語相繼上聞耀天威而盡
殮昭文德以卽敘止戈之慶計日可期臣等備位台司
倍百歡賀無任慶忭悅擇之至謹奉狀陳賀以聞貞元
十七年九月十二日